



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
07 Maiu 2021
Parlamentu Nasionál

Komisaun A Parlamentu Nasionál rona hanoin husi JSMP no parte relevante sira seluk kona-ba esbosu Estatutu Majistratura Judisiál

Komisaun A Parlamentu Nasionál iha 05 Maiu 2021 halo audénsia públika ho parte relevante sira hodi rona hanoin kona-ba esbosu Lei Estatutu Majistratura Judisiál nian ne'ebé inisia husi Parlamentu Nasionál ho Projetu Lei Nú. 21/V/2021. Parte relevante sira ne'ebé hola parte iha audénsia ne'e mak Prokuradór Jerál Repúblika no ekipa, Prezidente Asosiasaun Majistradu Judisiál, ne'ebé mós nu'udar Diretór ba Sentru Formasaun Jurídika no Judisiária (SFJJ), Eis-Prezidente Komisaun Reforma Lejizlativa no ekipa JSMP.

Objetivu husi audénsia públika ne'e mak atu rona hanoin no komentáriu husi parte relevante sira nian kona-ba esbosu lei ne'e molok Komisaun A halo diskusaun iha especialidade. Nune'e, bainhira Parlamentu Nasionál prodús lei ne'e, lei ne'e bele refléta ho di'ak realidade, interese no nesesidade parte hotu ne'ebé norma ne'e regula.

“JSMP foti aas tebes Parlamentu Nasionál nia vontade di'ak hodi promove partisipasaun públika, liuliu parte interesadu no relevante sira iha prosesu halo lei. Ida ne'e hanesan parte importante ida ne'ebé bele asegura kualidade lejizlasaun iha termu benefisiáriu sira sente no konsidera katak norma legál sira ne'ebé Parlamentu halo ne'e refléta ona ho di'ak sira-nia interese no bele responde ho efetivu ba sira-nia nesesidade,” dehan Diretora Ezekutiva JSMP, Sra. Ana Paula Marçal.

JSMP nia parte, iha apresentasaun, halo observasaun jerál de'it ba esbosu lei ne'e. JSM hanesan mós ho apresentadór sira seluk iha hanoin hanesan kona-ba relasaun entre Lei Organizaun Judisiária ho Lei Estatutu Majistratura Judisiál. Ida ne'e katak Parlamentu tenke aprova uluk Lei Organizaun Judisiária molok diskute no aprova Lei Estatutu Majistratura Judisiál nian. Lei Organizaun Judisiária nu'udar lei ida ne'ebé regula organizaun judisiáriu sira hotu inklui Tribunál, nune'e Lei Estatutu Majistratura Judisiál nian tenke kompatível ka han malu ho Lei Organizaun Judisiáriu.

Kestaun sira seluk ne'ebé JSMP halo nia observasaun mak hanesan kestaun direitu juis sira ba feriadu, kestaun apoiu psikolójiku ba autór judisiáriu sira no psikiater bainhira tribunal presiza ba kazu ruma, kestaun atitude ka komportamentu autór

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl

judisiáriu sira nian iha prosesu judisiál ba parte sira ne'ebé mai buka justisa no mós kestaun kona-ba funsionamentu Konsellu Superiór Majistratura Judisiál nian durante ne'e.

Relasiona ho kestaun feriadu juis sira nian, JSMP mós konkorda ho hanoin Prezidente Asosiasaun Majistradu Judsiál nian katak loron 15, mezmuke JSMP nia parte harak propoin loron 20, maibé ba interese atu asegura asesu justisa ba ema hotu nian, JSMP mós konkorda loron 15 ne'e. Importante mak iha loron 15 ne'e juis sira uza la ho enkomodasaun, tanba sira presiza duni deskansa ho hakmatek atu bele livre sira-nia hanoin husi kazu oin-oin ne'ebé sira prosesa ezemplu violasaun seksual, abuzu seksual, omisídiu no seluk tan. Nune'e, JSMP mós hanoin alende feriadu importante mós atu bele rekruta mós psikólogo atu bele ajuda hafresku autór judisiáriu sira nia hanoin tanba pezu serbisu todan tebes.

Kestaun atitude ka komportamentu autór judisiáriu sira-nian, JSMP hanoin importante atu tau iha konsiderasaun tanba iha influénsia boot ba konfiansa públiku nian ba serbisu judisiál nian. Bainhira parte sira ne'ebé mai buka justisa la hetan tratamentu ne'ebé di'ak no dignu mak sei fó impaktu ba konfiansa públiku nian hodi mai buka justisa liuhusi justisa formál. Alende ne'e, komportamentu ne'e iha mós relasaun ho pontualidade juis sira-nian iha prosesu julgamentu. Tuir observasaun JSMP nian, Prokuradór no Defensór sira bainhira la pontuál sempre hetan xamada ka juis sira hase. Nune'e, JSMP mós kestiona kona-ba kestaun pontualidade husi juis sira-nian no oinsa funsionamentu Konsellu Superiór Majistratura Judisiál relasiona ho kestaun dixiplinár ba juis sira.

Depoizde apresentasaun, iha sesaun diskusaun nian, kestaun ne'ebé sai preokupasaun husi kuaze parte hothotu nian mak kestaun rekursu umanu relasiona ho kriausaun Supremu Tribunál Justisa (STJ). Nune'e, Diretór SFJJ husu ba Governu, liuliu ba Parlamentu Nasionál atu bele koloka orsamentu ne'ebé suficiente hodi bele kria kondisaun ba halo formasaun ida ne'ebé di'ak atu bele kontribui ba hasa'e número autór judisiáriu sira. Tanba ne'e, Diretór SFJJ rekomenda ba Parlamentu Nasionál atu bele kria dispozisaun tranzitória ida iha lei ne'e atu bele fó tempu ba SFJJ hodi prepara rekursu. Bainhira harii STJ, juis ho prokuradór sira Tribunál Rekursu (TR) nian sei konkore ba no juis sira Tribunál Primeira Instáncia (TPI) sei konkorre fali ba fatin sira juis TR nian, entaun, número juis iha TPI sei menus liu tan. Relasiona ho kestaun ne'e, JSMP rekoñese katak Tribunál Supremu Justisa importante atu hari'i no komenta katak lei ne'e halo tenke refleta realidade nune'e bainhira implementa sei la iha impedimentu. JSMP hanoin, Konstituisaun no lei loka dalan ba membru STJ nian ne'ebé bele mós mai husi jurista sira ho rekoñesidu méritu ne'ebé hala'o knaar iha universidade, defensoria no advokasia. Nune'e, saida mak presiza halo mak tenke hamenus tiha kriteria kona-ba tinan esperiénsia serbisu nian ne'ebé aas hodi bele permite jurista sira konkorre no iha selesaun, bele hamenus tiha número juis sira husi TR, nune'e la fó impaktu boot ba número juis iha TR no TPI, se lae lei ne'e bele iha tiha maibé sei labele implementa tanba rekursu la to'o.

Kestaun seluk ne'ebé sai mós preokupasaun parte hothotu nian iha audénsia mak kona-ba tratamentu no kondisaun serbisu Defensoria Públiku (DP) nian. Tuir JSMP nian observasaun, DP la hetan tratamentu no kondisaun serbisu ne'ebé hanesan ho Ministériu Públiku no Tribunál nian. Nune'e, JSMP sujere atu bele halo tratamentu ne'ebé hanesan no kria kondisaun serbisu ne'ebé di'ak, liuliu fasilidade hanesan transporte no seluk tan. Nune'e, bele asegura qualidade serbisu Defensoria nian iha halo defeza ba ema sira ne'ebé buka justisa. Alende kestaun fasilidade, kestaun seluk mak kona-ba *per diem* ba julgamentu móvel ne'ebé han durasaun tempu fulan tolu ka dalaruma to'o neen mak foin hetan. Ida ne'e la'os ba de'it defensor públiku maibé ba mós juis sira no ofisiál justisa iha instituisaun rua ne'e. JSMP husu atu tau konsiderasaun ba asuntu ne'e atu nune'e bele motiva sira serbisu ho di'ak liutan.

Molok termina audénsia ne'e, deputadu sira membru Komisaun A no partikularmente Prezidente Komisaun A konkorda atu Parlamentu avansa uluk ho aprova Lei Organizaasaun Judisiária molok diskute no aprova Lei Estatutu Majistratura Judisiál.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <https://jsmp.tl/>